



© WILFRIED-DECHAU.DE

Terapia cun l'agen sistem d'immunitad – sche noss corp cumbatta sez il cancer

DA RICHARD CATHOMAS

■ **En il sector da la malsogna da cancer è oz fitg bler en moviment, da quai che fa speranza e da quai che tegna nus di per di en moviment. Per exempel l'immunoterapia.** A l'entschatta stat l'observaziun che la medema malsogna da cancer sa mussa savens fitg different dad in pazient a l'auter. Tar ils ins na sa il corp betg sa dustar, tar auters resta la malsogna calma durant onns. Daco talas differenzas? Cun raschun han ins supponì ch'il conturn dal tumor – pia il corp dal pazient sez – gioga ina rolla centrala. Ins ha chapì ch'il sistem d'immunitad sa da princip controllar ed eliminar cellas che sa midan e daventan malignas. Quest sistem funcziuna sco ina «maschina da schubregiar» che dismetta quai ch'è da memia u malsegir. Mo el na funcziuna betg senz'auter tar tut ils carstgauns tut-tina.

Cun questa savida han ins entschet a perscrutar co activar il sistem d'immunitad encunter il cancer – ed uschia forsia schizunt pudair tractar cancers senza medicaments toxics. Onns ed onns han ins fatg da tuts experiments, senza success.

Avant diesch onns han ins finalmain chattà la clav per questa porta: mintga giada ch'il sistem d'immunitad vegn activà (per exempel tras in cancer malign) sa el er vegnir franà. Da quest mecanissem profiteschan ils tumors per sa zuppar da la «maschina da schubregiar» – e san uschia crescer senza controlla e far im-mens donn. Ils perscrutaders han alura fatg tut per surventscher quest frain. Quai è reussì.

Questa scuverta ha mess en moviment in'unda da studis cun differents medicaments novs. Quels vegnan efectivamain d'activar il sistem d'immunitad, uschia che quel chatta sez il cancer e cumbatta el. L'immunoterapia n'è betg mo fitg ef-

fectiva, ella ha er pli paucs effects laterals negativs che la chemoterapia ch'ins sto savens applitgar.

Entaifer mo tschintg onns han ins fatg numerusas perscrutaziuns cun differents tips da cancer. En il Grischun avain nus davent da l'entschatta fatg part da plirs studis cun quests novs medicaments. Blers Grischuns e bleras Grischunas èn stads pronti da sa participar ed han uschia gia baul pudì profitar da questa medischina innovativa e sorprendenta. Oz applitgain nus regularmain l'immunoterapia per differents cancers.

I resta vinavant impurtant da sa participar a studis che perscruteschan la proxima generaziun da medicaments. Mo uschia savain nus tegnair pass cun il svilup e porscher er en il Grischun vinavant il meglier tractament als carstgauns che pateschan dal cancer.

L'autur è oncolog a l'Ospital chantunal grischun